

Anggota Suksis dilantik inspektor sukarelawan

PDRM yakin pelajar IPT dapat bantu banteras jenayah

Oleh Iwan Tun Tuah
ifwan@bharian.com.my

KUALA LUMPUR: Semua anggota Kor Sukarelawan Polis Siswa/Siswi (Suksis) yang menamatkan tempoh latihan asas di institusi pengajian tinggi (IPT) akan dilantik menjadi Inspektor Sukarelawan Polis di kawasan masing-masing.

Ketua Polis Negara, Tan Sri Musa Hassan (**gambar**), berkata mereka yang menjalani latihan selama tiga tahun dapat membantu

tugas Polis Diraja Malaysia (PDRM) terutama dalam usaha pencegahan jenayah di kawasan tempat tinggal masing-masing.

“Pelantikan itu bergantung kepada kekosongan dan jika tiada, nama mereka akan dimasukkan dalam senarai bebas dan diberi keutamaan untuk mengisi kekosongan apabila ada.

“Selain itu, mereka juga akan diberi keutamaan tinggi untuk diterima sebagai inspektor dalam PDRM jika mereka memilih menyer-

tai pasukan polis,” katanya ketika merasmikan Majlis Istiadat Tamat Latihan dan Pelantikan Kor Suksis IPTA Se-Malaysia 2009 di Universiti Putra Malaysia (UPM) di sini, semalam.

Turut hadir, Naib Canselor UPM, Profesor Datuk Dr Nik Mustapha Raja Abdullah; Ketua Pengarah Jabatan Pengajian Tinggi, Profesor Datuk Ir Dr Radin Umar Radin Sohadi; Ketua Polis Selangor, Datuk Khalid Abu Bakar dan Ketua Polis Kuala Lumpur, Datuk Wira

Muhammad Sabtu Osman.

Terdahulu, Musa menerima tabik hormat dan memeriksa perbarisan 762 pelatih dari 15 institut pengajian tinggi awam (IPTA) termasuk UPM, Universiti Teknologi Mara dan Universiti Perguruan Sultan Idris.

Musa berkata, penubuhan Kor Suksis ialah usaha kerajaan untuk mendekati graduan dan remaja menerusi aktiviti berfaedah yang mampu mengimbangi pembentukan minda dan intelektual.



“Latihan ini adalah peluang kepada graduan untuk memperkayakan diri dengan kelainan pengetahuan dan pengalaman yang memberi nilai tambah kepada mereka selepas tamat belajar,” katanya.

Beliau berkata, ketika ini sebanyak 20 IPTA sudah menubuhkan Kor Suksis dengan keanggotaan seramai 1,857 orang dan beliau berharap jumlah itu terus bertambah mencapai 3,868 bagi memenuhi perjawatan yang sudah diperuntukkan.